

Hobennan di Formacion Social

"Nada ta facil den bida, si bo kier logra algo bo mester lucha p'e"



ORANJESTAD(AAN): "Nada ta facil den bida. Si bo kier algo miho, bo mester lucha p'e," tabata palabra expresa den forma similar door di Carlos Maduro y Justin Petrocchi, ambos participando den di shete grupo di Formacion Social, desde cu e programa aki a worde introduci na 2011 door di Gabinete Mike I.

Hopi elogio tabatin pa e programa aki, un iniciativa

di Prome Minister Mike Eman, kende semper a kere cu mester cuminsa na duna oportunidad na e generacion mas hoben pa drecha nan direccion den bida, ya cu ta e grupo aki lo traha pa e economia di Aruba den e añanan nos dilanti.

Participante Maduro a haya hopi dificil e hecho cu den un periodo di tres siman nan no tabatin contacto cu esnan cu ta forma parti di nan circulo familiar y di amistad. Hustamente den e periodo aki nan ta siña e importancia pa percura pa bo "buddy" cu ta bira esencialmente bo famia. E ta contento cu e tabatin e pasenshi pa pasa e tres simannan leu di su famia.

Su tata Carlos Maduro tambe tabata presente y a splica cu hunto cu su señora a encurasha e yiu pa drenta e programa, cu nan ta haya un bon iniciativa, pa hobennan haya un di dos chens den bida. "E no tabata bayendo school y a cay den problema cu husticia. Pero danki Dios

e ta dunando di su banda pa sigui e programa di Formacion Social," e tata a duna di conoce.

El a agrega cu e programa aki ta test e hobennan pa mira si enberdad nan kier coy e rumbo corecto den bida. Petrocchi di su banda a bisa cu el a tende di e programa di Formacion Social for di algun amigo cu a participa y a logra cambia e rumbo di nan bida. Mirando esaki, el a haya apoyo di su famia pa drenta e programa. "Mi tambe tabata kier haya un miho futuro," el a bisa rondona pa su famia.

E ta admitti cu enberdad e prome tres simannan ta dificil, pero tur cos ta depende si bo ta mentalmente fuerte. Bo ta siña yuda otro pero tambe bo ta siña disciplina. Si bo haci un fout, bo tin cu paga pa esaki.

E no ta mira problema pa bolbe despues di fin di siman, ya cu el a constata cu e parti militar sigur ta algo cu e ta gusta.